

四庫全書

集部

欽定四庫全書

兩宋名賢小集卷二百二十

宋 陳思 編

元 陳世隆 補

勉齋先生集

黃幹字直卿閩縣人父瑀高宗時御史以篤行直道著聞幹師朱晦翁晦翁嘗曰直卿志堅思苦與之處甚有益遂以女妻之晦翁臨歿出所著書授幹曰吾

道之託在此幹初監嘉興石門酒稅歷官臨川漢陽
安慶皆有善政在位者忌其聲譽羣起擠之歸里第
子日盛稱勉齋先生諡文肅

石門

吳越天下富京畿游俠鄉隴畝盡膏腴第宅皆侯王世
言蘇湖熟霑溉及四方自我來石門觸目何淒涼清晨
開務門有酒誰復嘗纍纍挈妻子汲汲求糟糠父老稱
近年十載常八荒聚落成丘墟少壯爭逃亡

崇德憫雨四首

檣頭五雨搖空飛船頭百丈牽何遲數篙塘水清可涉
故鄉千里歸何時

塘中龍骨高數層龜坼田中縱復橫青裙簪笠倚車臥
但有空車無水聲

牛女盈盈河漢傍清風肅肅吹羅裳朱門達旦聽歌曲
莫遣濃陰蔽夜涼

老夫年老百不悲夜聽羣兒聲吾伊呼童握手長太息

不見儂家數口饑

喜雨四首用前韻

莫愁塵土壓天飛六月栽禾未是遲
待得麥麻收拾後通宵好雨定何時

雲霓天外起層層月相隨徹夜橫
費得天公能幾力數州愁苦變歌聲

睡覺歌聲古道傍有人終夜攬衣裳
牀頭斗酒聊自酌不為書窗一夜涼

山中書生休浪悲
變調自有臯與伊
清香一瓣來天竺
更把民饑作已饑

答曾伯玉借長編

白露下百草
迅商薄修林
幽人起長歎
感此節物深
攬衣自徘徊
撫劍還悲吟
丈夫各有志
莫作兒女心
涉遠當疾趨
畏影須就陰
願言理輕車
去上南山岑

九日早發桃枝嶺

登山豈不樂
況此風露清
排簷夜雨滴
詰旦天空明
歡

然金石交要我林泉盟支筇趵汗漫勇往不計程一水
何縈紆千峰鬱崢嶸仰視臨雲馳俯聽幽壑鳴班荆得
所適斗酒聊共傾人生會有累聚散如浮萍今晨諧勝
遊異日難忘情意愜各賦詩庶以紀此行

道間觀瀑布

行行益以遠愜此心期幽一徑險復夷千林密相樛回
首天際山矗面懸飛流銀潢倚石壁玉龍下山湫光搖
日璀璨勢激風颼颼可望不可親神往形獨留眷言桃

枝山久懷卜築謀豈無一日閒努力窮冥搜

侍文公飲浮翠用劉叔通韻

涼風振幽壑陰雲翳前山高懷勵清秋適意林莽間煙
橫萬家井水淨雙溪灣徙倚暮忘歸人境相與閒遊子
獨何為千里方言還陪此杖屨遊忘彼道路艱心期更
他歲依嵒結柴關

與胡伯復

白露下百草玄雲翳崇岡遊子暮何之倏若孤雁翔朝

發長沙渚夕息湘山陽飛鳴念儔侶慷慨增悲傷故人
懷我深遠寄金玉章開緘且疾讀慰此饑渴腸是時日
中火朔風埽枯黃歲月能幾何臯蘭結微霜脂車策良
馬日暮道正長徒僕審驅馳前途畏榛荒劣質若難任
白雲懷故鄉南山一舍隔矯首空西望

送章元德司理罷官歸永嘉

送君北門坂遙望東甌路
戢戢白鶴嶺渺渺飛鸞渡
上有虎豹嗥下有蛟龍怒
車馬堅且長維櫟夙已具
寒裳

涉其險萬怪不足懼世路劇羊腸皦皦誠易汙但能心
無愧窮達安所遇母為婉孌者暫蹶輒驚顧生平麋鹿
姿處世歎多忤胡為展良覲握手便如故高懷發鍼石
正論諧韶濩情親復告別欲語誰與晤乾坤一逆旅日
月雙脫兔寒儒守蓬華白首困章句期君以遠大庶足
慰遲暮


慶元己未冬至前二日訪林公度至栗山翌日同
訪吳必大林季亨容之偕行愛其溪山池亭之

勝為之賦詩

篝火下修嶺褰衣涉清川夜投故人廬洞壑藏真仙一
水遠縈紆兩山對蜿蜒但見煙雲深不識車馬喧主人
敬客至杯酒羅堂前諸孫競勸酬烹羊雜雞鮮同來二
三友妙語爭春妍此會良獨難達旦不復眠雞鳴秉燭
遊到君新池邊中有讀書堂藏書更精研把筆記名姓
徘徊悵無緣天明驅車去去上層岡顛回首三歎息安
得數畝田結茅與君鄰嘯傲終殘年

過翠微

古寺殘僧少
孤村碧樹圍
明朝山下路
愁絕望煙歸



欽定四庫全書

兩宋名賢小集
卷二百二十

六

兩宋名賢小集卷二百二十

欽定四庫全書

集部

兩宋名賢小集卷二百二十六至

詳校官中書臣孫溶

助教臣常循覆勘

總校官編修臣王燕緒

校對官學正臣周鏐

膳錄監生臣張椿

欽定四庫全書

兩宋名賢小集卷二百二十一

宋 陳思 編

元 陳世隆 補

退菴遺集

吳淵字道父寧國人嘉定七年進士累官江東安撫使行宮留守兼屯田使拜參知政事封金陵侯有退菴遺集

早朝步葛元詰韻

萬井蒼涼欲曙天
禁鐘聲斷佩聲聯
雲浮玉輦霞裾降
風動金蓮寶炬燃
四國龍飛清穆世
羣工虎拜太平年
吾王不憊宵衣念
國祚遙知永永傳

九日

百年王事漫勞形
客裏逢時跡類萍
無酒可添元老興
任人浪笑阮宣醒
荆湖城壁連鉦鼓
河朔黎元陷寇庭
久擁旌旄愧無補
敢將衰朽歎飄零

登南城

江城一眺思悠悠
平楚蒼然野水流
衰草寒煙梅老墓
敗垣斜日謝公樓
江山有恨英雄老
天地無私草木秋
萬古興亡俱是夢
丈夫何者為身謀

遊青山

謝朓宅
在焉

碧嶂千層鎮一州
十年前記作斯遊
因看紅杏行停轡
為濯清泉坐解裘
怪石巉岩蹲虎豹
老松偃蹇臥龍虬
轉高轉有無窮景
杖履何妨絕頂頭

風流千載憶玄暉此日登臨不覺疲
看取眼前都是句如何身後不留詩
須知小飲徜徉日正是高吟寥泺時
可惜出山終不免空留翠岫與清漪

橫碧堂

十一年如一欠伸今朝又得快登臨
半城楊柳春風滿四野桑麻雨露深
檻外翠峰重入眼樽前白髮遂驚心
感今懷昔憑闌處不覺崦嵫日已沈

用前韻

每來登眺便眉伸
高處蒼霄儼若臨
投老光陰隨日晚
思歸情緒與秋深
鷺飛沙際明人目
雁滿江頭動客心
北望淮淝何處是
晚來煙霧正沈沈

官梅亭

疇昔花前屢舉觴
重來鬢髮已蒼蒼
未容籬菊成歸隱
且向官梅作醉鄉
每約松篁堅歲晚
肯隨桃李競春芳
東風二月無珍惜
片片霏霏雪自香

宿蕤亭三首

正到春歸惱客腸
荼蘼架上發孤芳
劉伶嗜酒名為酒
薛女餐香肌亦香
人已今朝衰鬢髮
花猶昔日淡梳粧
十年陳迹渾如夢
徒倚闌干到夕陽

東皇為代是南熏
醞釀成花迥出塵
盡洗嬌紅春態度
獨呈雅素雪精神
牽衣弱蔓如留客
入枕清香更惱人
月下星前曾醉挿
肯容煩暑到冠巾

園丁編竹亦勤哉
老蔓纖條費剪裁
香香翠雲深作洞
霏霏香雪簇成堆
玉虬飛下盤千尺
金爵攜將飲百杯

說與此花狼籍後園林杖屨亦稀來

揮麈堂二首

老守重來何所為築成臺榭鑿成池綠深夜雨龜魚遠
紅塵春風鶯燕遲民樂軒墀偏少訟官閒園圃自多詩
鳳團吸罷投衾枕夢覺花間日影移

戀宿懷安物我齊況兼兩世四持麾可憐園內樂成日
却被宮中捉去時李郭詩篇懷舊迹歐梅歌舞悵新知
多應日後清宵夢頻到姑溪溪水湄

送杜尚書赴行在

龍德剛中道學優洛中夫子爾同流暫離天府安邊閫
又屬輶車返帝州萬里長城唐李勣百年勲業漢留侯
明朝回首秋江上泰華巖巖天際頭

冬雨

坐來雜霰灑隆冬痛飲那禁感發風却憶西樞承旨日
冒寒猶立大明宮

高氏小景

地白天寒凍裂裘何人乘艇下中流披圖孟浪不相識
疑是當年王子猷

峨眉山

在米石見
寰宇志

一帶天分南北限兩眉煙鎖古今愁

缺

附詩餘

念奴嬌

牛渚

我來牛渚聊登眺客裏襟懷如豁誰著危亭當此處占

斷古今愁絕江勢鯨奔山形虎踞天險非人設向來舟
艦曾破風浪千疊追念照水燃犀男兒當似此英雄
豪傑歲月匆匆留不住鬢已星星堪鑷雲黯江天煙昏
淮地正是斷魂時節欄干撾碎酒狂忠憤俱發

水調歌頭

杏

太白已仙去詩骨此山藏胸中錦繡如屋都乞與東皇
碎剪杏花千樹濃抹胭脂萬點妖艷斷人腸曉露沐春
色晴日漲風光孤村路途休暇共徜徉酒旗斜處一

簇幾紅粧暫息江頭烽火無奈鬢邊霜雪聊復放疎狂
倚俟玉壺竭未肯寶鞭揚

沁園春

壽弟
相國

喜我新歸逢戎初度關情更深正晝掩柴扉我尋隱遯
曉舒愧府戎正經綸白石清泉紫樞黃閣同氣何妨出
處分休嘲笑儘弟為宰相兄作閒人南國借我登臨
都不怕近前丞相嗔但曳履扶筇堪憐獨步攜壺載酒
每歎孤斟七袞開顏六旬屈指風雨對牀頻上心慙慙

祝道何時回首及早抽身

兩宋名賢小集卷二百二十一

欽定四庫全書

兩宋名賢小集卷二百二十二

宋 陳思 編

元 陳世隆 補

栗齋詩集

鞏豐字仲至號栗齋其先鄆州須城人渡江為婺州
武義人少游呂東萊之門淳熙十一年進士嘗知臨
安縣稍遷提轄左藏庫卒有東平集

曉起甘蔗淵

曉起東風惡晴嵐忽變昏船隨山共走霧與水相吞鉦
鼓遙知寨桑麻畧辨村雨來無準則容易濕柴門

夜雨曉起方覺

夜雨鳴簷送五更不驚高臥最多情窗間細視花無恙
牆外隨聽屐有聲數把柔絲堤柳嫩一奩方鏡闌波清
出門眼界殊明潔但覺春寒處處生

晨征

靜觀羣動亦勞哉
宜獨吾為旅食
催雞唱未圓天已曉
蛙鳴初散雨還來
清和入序殊無暑
小滿先時政有雷
酒賤茶饒新麪熟
不妨乘興且徘徊

離建

旅中多得早朝晴
野潤衣襟苦未清
時時數點雨猶落
隱隱一聲雷不驚
山入夏來差覺老
花從春去久無情
長汀又涉來時路
麥隴桑村小問程

湖嶺下十里是為清澹灘
行者多至此捨舟

欽定四庫全書

兩宋名賢小集
卷二百二十二

急流方了又高岡日永周旋未覺忙壁上字多知店老
嶺邊松茂喜車涼叢叢亂篠承欹石帖帖新荷戀小塘
清澹惡灘應笑我為虞魚腹犯羊腸

寒夜

瓦欲飛霜水欲冰蒲團今夜有塵凝爐寒閣取薪添
火窗暗時將燭助燈久欲歸田游宦客未能忘肉在家
僧於書更覺心情懶病眼愁看細字蠅

中旬休日呈巖老

近見東郊出土牛燒燈已過又旬休酸風鱗面慵開
眼細雨毛空怯上樓百歲光陰真蟻穴一年寒燠未
鴻溝偷閒文字聊遮眼勲業悠悠且掉頭

欽定四庫全書

兩宋名賢小集
卷二百二十二

兩宋名賢小集卷二百二十二

欽定四庫全書

兩宋名賢小集卷二百二十三

宋 陳思 編

元 陳世隆 補

遂初小藁

尤袤字延之無錫人入太學以詞賦冠多士尋冠南宮紹興十八年登進士第嘗為泰興令修築外城不為金冠所陷吏民為立生祠注江陰學官需次七年

為讀書計從臣以靖退薦召除將作監簿太宗正闕
外人爭求之陳俊卿曰當予不求者遂除表復授秘
書丞歷著作郎兼太子侍讀初張說自閣門入西府
從臣因執奏而去老數十人表率三館上書諫與郡
得台州有毀表者高宗疑之使人密察民誦其政不
絕口乃錄其東湖四詩歸奏上歎賞遂以文字受知
累遷樞密院正兼左諭德輪對申言民貧兵怨者甚
切夏早求言表上封事高宗崩前一日除太常少卿

當定廟號表與禮官定號高宗洪邁獨請號世祖表
率禮官奏謂太上以子繼父不可援光武為比以亂
昭穆之序孝宗卒從初議會建議事堂令皇太子參
決庶務表時兼侍讀乃獻書以為儲副之位止於侍
膳問安不交外事撫軍監國自漢至今多出權宜乞
懇辭以彰殿下之令德進權禮部侍郎兼同修國史
侍讀既而兼權中書舍人先是命兼直學士院辭至
是復詔兼之辭不允孝宗內禪議已定諭表曰旦夕

制冊甚多故處卿以是職表乃拜命光宗即位開講筵表歷舉唐太宗不私秦府舊人為戒又數日復論官制謂武臣披堅執銳者積功累勞僅得一階權要貴近之臣優游而歷華要姜特立以為議已言者因為周必大黨遂與祠紹熙元年起知婺州改太平州召除給事中既就職即昌言曰老矣無所補報凡營求內降小礙法制者必不奉詔所繳奏甚多至為上震怒裂其奏事竟不行除禮部尚書上屢以疾不

詣重華宮表先後奏請駕隨出時上已屬疾國事
多舛表積憂成疾請告不報疾篤乞致仕又不報遂
卒年七十贈金紫光祿大夫表少從喻樛汪應辰游
樛學於楊時時程頤高弟也方乾道淳熙間程氏學
稍振忌之者目為道學將攻之表在掖垣首言夫道
學者堯舜所以帝禹湯武所以王周公孔孟所以設
教近立此名詆訾士君子故臨財不苟得所謂廉介
安貧守分所謂恬退擇言顧行所謂踐履行已有

恥所謂名節皆目之為道學此名一立賢人君子欲
自見於世一舉足入其中俱無得免此豈盛世所宜
有孝宗曰道學豈不美之名正恐假託為姦使真偽
相亂爾待付出戒勅之表死數年侂冑擅國於是禁
錮道學賢士大夫皆受其禍識者以表為知言嘗取
孫綽遂初賦以自號光宗書扁賜之有遂初小藁六
十卷內外制三十卷諡文簡孫焞禮部尚書

遊張公洞

吾聞荆溪南有地仙所宅十年勞夢想今日著脚歷扁舟
下湖湫水漲沒沙磧結纜小橋旁杖藜從此適平岡
面陂陁疊嶂堆甃積行行兩三里夾道喬木植其木幾
合抱其高乃千尺風生萬壑響日照四山赤時搖樹林
杪忽見屋宇脊宮門何崢嶸古道頗修直長廟景曠曠
崩殿人寂寂寥落昔賢題摩娑壁間墨捫蘿上層巔俯
瞰得深窟危梯交枝撐鳥道穿詰屈投身乍寬閑跼步
仍偏窄攀援愁顛躋傲睨驚險僻懸崖朶頰頷亂石拱

劍戟白雲何時橫乳溢或自滴中空正瀕洞了不見天
隙冥行迷近遠偃倭猶撻埴巉巖豈人工隱軫入地脉
窓幽或篝火俯跪僅容席仙壇尚故處丹竈儼遺跡山
蟲鳴咿嚙野鼠聲嘖嘖傳聞老父語以往真莫測中有
白玉堂橫絕巨石塞傍連洞通野欲去不可極潛窺目
先旋縱走膝無力遭迴步仄徑突兀出峭壁縱風高枝
樛藤蔓青陰冪芳草何芊綿丹花亦狼籍躊躇古亭上
頻仰幽澗碧叮嚀下流水磊砢欲落石雖云培塿高氣

與嵩華敵其南有空穴澹瀕殷幽黑陰風訝谷吐冷氣
森噴逼蛟龍久伏藏金玉閤簡冊靈蹤信茫昧幻怪紛
慘戚將無神物守欲與世壤隔平生丘壑志早歲泉石
癖豈不思三山所恨無六翮樂哉茲晨遊逸興潛有激
仙翁在何許綠髮尚如昔髣髴笙簫聲徘徊鸞鶴翼俗
緣磨不盡塵境坐形役何當築衡茆幽討窮日夕風雲
西北起天地忽改色倉皇促歸旆造物宜戲劇良遊易
乖忤真賞難再得寄與山中人重來儻相識

梅

不奈雪埋照，可堪風漏香。
天寒無疹粟，日暮有嚴粧。
桃李羞浮艷，松筠共老蒼。
千山愁絕裏，獨自占年芳。
冷艷天然白，寒香分外清。
稍驚春色早，又喚客愁生。
待索巡簷笑，嫌聞出塞聲。
園林多少樹，見爾眼偏明。

蠟梅

破臘驚春意，凌寒試曉粧。
應嫌脂粉白，故染麝香黃。
綴樹蜂懸室，排筍雁著行。
團酥與凝蠟，難學是生香。

雪

睡覺不知雪但驚窻戶明
飛花厚一尺和月照三更
草木淺深白丘塍高下平
饑民莫恣怨第一念邊兵

別李德翁

長恨古人少斯人今古人二
難俱益友兩載覺情親
世態深難測心期久益真
相看俱半百此別倍酸辛

送趙成都

蜀道當謀帥維城孰愈公
夷陵護江左斜谷顧關中
北

地紛豺虎南方簇蟻蠹守攻雖有異鎮撫不妨同

不但元戎貴仍兼制使雄深沈天與度簡敬學成功人
士薰陶內兵民教訓中祇應先卻穀寧復後文翁

己亥元日

玉厯均調歲啟端東風又逐斗杓還蕭條門巷經過少
老病腰支拜起難白髮但能欺槁項青春不解駐朱顏
餘齡有幾仍多幸占得山林一味閑

次韻德翁苦雨

十年江國水如淫，怕見三秋雨作霖。
可念農家妨卒歲，須煩風伯蕩層陰。
禾頭昨夜憂生耳，木德何時却守心。
兀坐書窓詩作祟，寒蟲鳴咽伴愁吟。

次韻尹朋梅花

江北江南天未春，陽和先已到孤根。
斜枝冷落溪頭路，瘦影扶疎竹外村。
水部未妨時遣興，王妃誰復與招魂。
天寒好伴羅浮醉，明月清風許重論。

梅花

竹外籬邊一樹斜可憐芳意自萌芽也知春到先舒蕊
入被寒欺不放花索笑幾回驚歲晚相思一夜遠天涯
直須待得垂垂發踏月相携過酒家

冷蕊疎枝半不禁眼看芳信日駸駸雪霜不管朝天面
風月能知匪石心望遠可無南北使客愁空費短長吟
年年準擬花排恨不道看花恨更深

落梅

清溪西畔小橋東落月紛紛水映紅五夜客愁花片裏

一年春事角聲中歌殘玉樹人何在舞破山香一作曲

未終却憶孤山醉歸路馬蹄殘雪襯東風

入春半月未有梅花

枯樹扶疎水滿池攀翻未見玉團枝應羞無雪教誰伴
未肯先春獨探枝幾度杖藜貪看早一年芳訊恨開遲
留連東閣空愁絕只誤何郎作好詩

德翁有詩再用前韻

文章仙伯記仇池每想橫斜竹外枝未放柔柯攢玉雪

稍看紅帶染燕支別來望遠憑誰寄老去尋春只恐遲
把酒問花花解語定應催促要新詩

次韻渭叟蠟梅

快瀉鵝黃若下春要將香色鬪清珍蠟丸暗折東君信
梳貌寧欺我輩人先價未輸何遜早新篇重見豫章
新渾金璞玉爭多必要與江梅作近親

甲午春前得雪

寒聲昨夜響蕭蕭逗曉堦庭亦已消殘蠟昨春無幾

日一年飛雪只今朝微陽欲動梅驚萼餘潤纔沾麥放
苗天意未能違物意漫留殘白占山腰

飛英回旋逐風飄爽氣令人意欲消荏苒流年春送臘
殷勤密雪暮連朝冬回庾嶺花無數烟暖藍田玉有苗
一飽自今真可望更看南畝麥齊腰

凍雲排陣擁山椒待伴還應不肯消皎月冰壺千頃夜
冷煙茅屋幾家朝梅枝堆亞難尋萼萱草侵凌不辨苗
殘甲敗鱗隨處是被誰敲破玉龍腰

正月二十八日夜大雪

一冬無雪潤田疇渴井泉源凍不流昨夜忽飛三尺雪
今年須兆十分秋占時父老應先喜忍凍饑民莫漫愁
晴色已回春氣候晚風搖綠看來年

劉屯田墓壯節亭

西澗當年卜考槃便于神武挂衣冠後生無復知前輩
故老猶能說長官三尺荒墳埋玉冷百年壯節倚天寒
表章賴有羣賢力誰把生芻奠一餐

送趙子直帥蜀得湏字

射策當年首漢儒去登雲路只欺須飽聞治最誇閩部
已有先聲到益都壯畧定羌元自許宗英帥蜀舊來無
前驅叱馭休辭遠看取東歸上政塗

帝念西南在一隅簡求才德應時須羌夷種落誇威令
秦隴關河聽指呼自古功名多少壯及今談笑定規摹
玉山舊政人誰記應埽棠陰看畫圖

海棠盛開

兩株芳蕤傍池陰一笑嫣然抵萬金火齊照林光灼灼
彤霞射水影沈沈曉粧無力胭脂重春醉方酣酒暈深
定自格高難着句不應工部總無心

玉簪花一名鷺鷥

一種幽花迥出塵孤高耻逐艷陽辰瑶枝巧挿青鸞
扇玉蘂斜欹白鷺巾難與松筠爭歲晚也同葵藿起
時新西風昨夜驚庭綠滿院清香惱殺人

送林景思

三年無德及斯民獨喜從遊得此君囊之一錢窮到骨
胸蟠千古氣凌雲論交却恨相逢晚別袂真成不忍分
後夜相思耿空閣尺書應許雁知聞

送晦菴南歸

二年摩手撫瘡痍恩與廬山五老齊合侍玉皇香案側
却持華節大江西鼎新白鹿諸生學築就長虹萬丈提
待哺饑民偏戀德老翁猶作小兒啼

送提舉楊大監解組西歸

征轅已動不容攀回首棠陰蔽芾間為郡不知歌舞樂
憂民贏得鬢毛斑澄清未展須持節注想方深便賜環
從此相思隔煙水夢魂飛不到螺山

送吳待制即襄陽

方持紫橐侍西清忽領雄藩向著行誰謂風流貴公子
甘為辛苦一書生詞源筆下三千牘武庫胸中十萬兵
從此君王寬北顧山南東道得長城

欲將盤錯試餘鋒故擁旗麾訖外庸南峴北津形勝地

前羊後杜昔賢蹤不妨倒載同民樂自有輕裘折敵衝
努力功名歸報國莫思山月與林鐘

青山寺

崢嶸樓閣挿天開門外湖山翠作堆蕩漾煙波迷澤國
空濛雲氣認蓬萊香銷龍象輝金碧雨過麒麟剥翠苔
二十九年三到此一生知有幾回來

聽鶯閣

春催金谷曉一望百花齊不作遼西夢從渠著意啼

和渭叟梅花

不避風霜苦自甘
丘壑潛未禁沾額
角信好揀梳尖春
意已張本寒威今
解嚴殷勤留客意
尚許隔牆覘

德翁有詩再用前韻

立馬黃昏遶曲池
幾回踏雪問南枝
不應春到花猶未
定恐寒侵力不支
隴上已驚傳信晚
樽前只想弄粧遲
臨風不語空歸去
獨立無慘自詠詩

嘗記尋芳到習池
攀條頻認去年枝
曉穿曲徑千林去

晚度危橋一木支不避春寒來得得只緣人望故遲遲
無錢可辦羅浮醉報答春光只有詩

遊閣阜山

春山靈草百花香誰識仙家日月長滿院莓苔綠陰匝
棋聲何處隔官牆

括署四咏

君子堂

堂堂文簡公一世夔與臯君子哉若人此言聖所褒遺

愛在斯民誰能薦牲牢獨有坐嘯地清風仰彌高

節愛堂

誰憐窮山民糠粃不自贍紛紛死溝壑往往困征歛夫
惟節與愛是謂仁且儉揭茲聖人言聊用自鍼砭

凝思堂

失脚隨塵網牒訴障吾懷公庭了官事時來坐幽齋天
風肅冷冷山鳥鳴喑喑我思在何許獨對蒼然崖

樂山堂

草堂有遺基榛莽歲月久我來始經葺挹翠開戶牖
羣山供笑傲萬象皆奔走所以名樂山欲企仁者壽

兩宋名賢小集卷二百二十三

欽定四庫全書

兩宋名賢小集卷二百二十四

宋 陳思 編

元 陳世隆 補

章泉詩集

趙蕃字伯昌

又作昌父

宋宗室居玉山博學工文詞以曾

祖賜蔭補官直秘閣致仕蕃性寬平樂易而剛介不可奪嘗受學于朱紫陽少喜作詩讀者以為有靖節

之風江南文士赴都者多求其作得其片言隻字無
不珍重學者稱為章泉先生所著有章泉集

小園早步

今朝欣雨止天氣漸柔和籬落小桃破階除馴雀多占
方移果樹帶土濯蔬科農務侵尋及吾寧久卧疴

連雨

夜窓連曉枕城郭與山林旱苦七八月雨欣三日霖殊
勝建武穀更念櫟陽金斗食端何直胡為久滯淫

雨望偶題

漠漠青山雨霏霏白露煙詩材來遠近畫幅極中邊
流落雖天外登臨賴目前浮生才幾日此地欲三年

雨中不出呈斯遠兼示成甫

湖外頻年客江東邇日歸欲知年事迫看取鬢毛非
寄意雖梅柳關心在蕨薇令予倒芒屨須子叩柴扉

嚴先輩詩紅梅次韻

盡道梅花白能紅又一奇渾疑丹換骨不是酒侵肌
看

此數腴色思儂少壯時盛年雖不再猶擬歲寒知

分界舖愛直驛張安道因杉製名而驛之前有老
梅一株不知安道何為捨彼而取此也

杉是誰人種梅從何代栽腹空雷有擊根瘦土無培要
是百年物曾經幾客來直哉雖見錄清矣可遺材

憶梅

縱之幽人宅猶餘大樹祠帶山仍帶水宜飲亦宜詩勿
待全開後當乘半放時昏昏郭陰務皎皎上朝曦

榴花

樹陰看已合榴朵見初明
當夏豈無意避春真有情
花雖後文杏實可待瓊橙
病叟緣何喜留苔看落英

送王子遵赴衡陽丞

王郎妙人物獨步尚江東
昔尉既不醉今丞寧肯龍
相依唇齒國忽去馬牛風
清絕官曹外何年着我同

螢火

渾忘生朽質直擬慕光輝
解燭書帷靜能添列宿
稀當

風方自表帶雨忽成微變滅多無理榮枯會一歸

蛺蝶

不逐春風去仍當夏日長一雙還一隻能白或能黃戀戀不能已翩翩空自狂計功歸實用終自愧蜂房

暖甚去綿衣

誰道江南春有寒未經社日衣能單桑麻過雨日夜長桃李因風高下殘舊說中州政如此了知瘴氣不能干天公似憫斯民病故體淳熙詔令寬

十一月五日晨起書呈葉德璋司法

卧聞落葉疑飄雨起對空庭蓋卷風正自推頽同病鶴
况堪吟諷類寒蟲忽思有客渾如我却念題詩不似公
已分薶臧終白首可因霜雪愧青銅

次韻葉德璋見示

窮冬未省見梅班故里何由報竹安歸意寧須卜以決
衰顏休待鏡頻看交情謝子來今雨節物娛予後苦寒
獨酌更憐終漫興不如飢餓得天歡

上已

朝來一雨快陰晴東郊百鳥間關鳴愛風柳條不自惜
蘸水桃花可憐生不見山陰蘭亭集況乃長安麗人行
東西南北俱為客且送江頭返照明

梅花

平生欠汝哦詩債歲歲年年須要還未至臘時須訪問
已過春月尚躋攀直從開後至落後不問山間與水間
却笑淵明賦歸去庭柯目盼自怡顏

全樹婆娑夥匪奢數枝纖瘦少尤佳春風上苑吾何忝
落日孤村汝自嗟定論要為塵外物飽看寧是世間花
不然山谷能詩老曷與山礬定等差

頃與公擇讀東坡雪後北臺二詩歎其韻險而無
窘步嘗約追和以見詩之難窮去冬適無雪正月
二十日大雪因用前韻呈公擇

細思不是冬無雪留待春風闌冷嚴病骨未憂衣乏絮
早餐寧歎食無鹹梅添鑿落依同色竹擁參差半入簷

坐守地爐應不厭破牕頻見北山尖

雪埋老屋無薪膏晨起謀炊自毀車覓飽預期千頃麥
破慳先試一春花便營野屐尋茶戶更約緋袍當酒家
處士至今疑姓賈壁間但沒挂錢叉

蚤立寺門作

春天陰晴無定姿陰雲未卷晴風吹青山表見花顏色
綠水添增鷺羽儀郭外不知誰是主眼中今見我題詩
人生何物非郵傳敢謂吾廬不在茲

出郭

踈籬樹樹李花雪野寺條條楊柳絲春風收雨雨收後
白日變晴晴變時有餘不足無盡景補短截長何限詩
煙霞痼疾句成癖老矣折肱真得醫

晚晴

殘風落日蟬亂鳴細履小園欣晚晴投林倦鳥分暝色
蒲地落葉無秋聲衛尉一錢曾不直阮郎幾屐畢平生
三十六中第一策脫却世故甘傭耕

二月十日喜雨呈李純教授去非尉曹

滄浪一夜起鳴雷雨陣因之續續來所病農家成久旱
未論花事有新開書生狂妄常憂國聖代飄零少棄才
儒館尉曹俱國士好為詩賦味康哉

雨後呈斯遠

已是霜凝更雨濕春其漸起但無痕莫嗟草色有垂死
定見梅花當返魂小駐要須窮日日細尋無惜徧却却
揩摩病眼從茲始併待君詩洗睡昏

送趙成都二首

蜀道當謀帥維城孰愈公夷陵護江左斜谷顧關中北
地紛豹虎南方簇蟻蠡守攻雖有異鎮撫不妨同
不但元戎貴仍兼制使雄深沉天與度簡敬學成功人
士薰陶內兵民教訓中祇應先却穀寧復後文翁

菊

蔓菊伶俚不自持細香仍着野風吹少年踴躍豈復夢
明日蕭條更自悲潭水解令胡廣壽夕英何補屈原饑

我今漫學潯陽隱，晚立寄懷空有詩。

懷玉山

禪月詩僧古道場，山雄吳楚接華陽。
踈通八磔蛟龍隱，高竝雙峯虎豹藏。
雲母屏寒消瘴氣，藍田壁潤吐虹光。
碧桃花落仙人去，靜聽松風心自涼。

絕句

紅葉連村雨，黃花獨徑秋。
詩窮真到骨，酒薄不禁愁。

哭蔡西山

鵲叫春林復遞詩雁回霜月忽傳悲
蘭枯蕙死迷三楚
雨暗雲昏礙九疑
早歲力辭公府檄
暮年名與黨人碑
嗚呼季子延陵墓
不待饒辭行可知

跋韓澗泉絕筆詩後

周漢歷歷上下秦侯王將相史疊陳辱斯榮斯仁不仁
桃源鹿門商山人南礪遠孫澗之濱所以三人入吟呻
桃源本是畊農民鹿門高山抱經綸一世雖屈九原伸
所以絕筆於獲麟我之擬賦非厥倫威公語我淚沾巾

欽定四庫全書

兩宋名賢小集
卷二百二十四

八

賦黃小園山居

何謂雪名寮應同立積腰要為膏以潤不作硯而消園
小鋤斯食書多腹不朽青雲附能顯況乃白雲招

跋劉溪翁韓家府詩後

何人詠出韓家府是我建陽劉叔通盡道唐人工樂府
罕能褒貶似渠工

誰詠韓家府建陽劉叔通是為聞以戒斯可謂之風妾
矣彼侂冑哀哉吾魏公向者歌頌者豈但劇秦雄

兩宋名賢小集卷二百二十四

欽定四庫全書

兩宋名賢小集卷二百二十五

宋 陳思 編

元 陳世隆 補

滄浪詩集

嚴羽字丹丘一字儀卿邵武人粹溫中有奇氣嘗問學於包克堂自風騷而下講究精到石屏戴復古深所推敬自號滄浪逋客有滄浪集二卷行于世

行子吟

行子在江梅飄飄靡常蹤有如芒碭野朔風捲飛蓬朔
風無休期飛蓬日千里散落天地間寧有復歸理塞雁
西北來一叫三徘徊何時別沙漠昨夜宿陽臺同羣一
相失羽翮常低摧人物有殊性奈何罹此哀

憶昔客遊初結交重豪邁高冠湛盧劍志若輕四海白
首悔前圖蹉跎天一隅寒冬劍門道失路空踟躕深林
聚豹虎絕壁號魑魅雪深車軸折征馬驚啼呼何當返

故處殮黍居田廬淚下不能禁腸轉如轆轤

我友遠言邁

朔風卷秋樹白日寒無光是時鴻鴈來四野何蒼茫我
友遠言邁使我結中腸如何攜手歡一旦成異鄉行旅
有期程遊子多悲傷置酒欲高歌淚來沾我裳四座慘
相顧征馬亦徬徨未知會面日且復盡茲觴

悠悠我行邁

悠悠我行邁邈在天一方道路無終極時節異炎涼路

逢故里親揮泣問我鄉妻子別離久不知今存亡中原
多白骨城邑聚豺狼遠去無僮僕思還絕餼糧寄語家
中人遠行良可傷

朝日臨高臺

朝日臨高臺睽彼芳樹間上有共棲鳥和鳴何闕闕爾
乃慕儔侶我何獨不然良友在萬里邈然河與山聚會
豈不思歲月倏已殫未必無他人要非心所歡

仙遊

憶讀玲瓏篇來往虛皇閣空見白芙蓉秋風幾凋落昨
逢紫陽君共有丹臺約下視塵埃中冠纓縛援攬世事
行若此悠悠復何託

朝別簡寂觀夜行石鏡溪溪光照屋綠月色正相宜石
上三道士頎然好丰姿或弄金光草或把珊瑚枝憑風
招素手賜我一玉卮歎我事遠遊蕭颯朱顏衰長林孤
月落羽蓋何歲隄垂垂果之去棄我忽若遺明發闌無
覩但有青鸞啼

瀑布似明月上有石梁橫矯首望東海正見蟾蜍生揚
輝天漢間下照蓬丘城桂實幾凋落姮娥空聞名吐哉
玉斧子不如白兔精靈藥不服食執柯獨何成迢迢彩
雲外誰吹白玉笙竦身一長聽予若出寰瀛

登豫章城

憂來不自得登城望高天寒雲四面起朔風下長川脫
劍且却坐君知心惘然奈何平生志鬱抑江湖間凜凜
秋風來茫茫落日晩長憂生白髮沈想忘朝飯向來經

濟士本是碌碌人
蕭曹刀筆吏
樊灌屠販臣
徒步取勲業
漢道為光新
我今何為者
飄飄去鄉國
狂歌豫章城
醉卧風江碧
但取英雄笑
終慙倜儻生
名當以德載
事恥因人成
獨酌還獨酌
哀歌還寂寞
安得凌風翰
為君拂寨邈

遊臨江慧力寺

舟中望古剎
川上移琴樽
隱隱林閣見
迢迢鐘梵聞
列岫不離席
驚濤常在門
風帆與沙鳥
汎汎隨朝昏
天高

一幙挂室靜衆香焚煙起多近郭鴉歸無遠村松際尚
微雪經年來暮接賞惟靜者契法對高僧論安得息塵
駕永懷瞻獨園明朝別此去惆悵滿松雲

山居即事

稍欣入林深已覺煩慮屏霜果垂秋原歸禽度嵐領紛
紛葉易積漠漠雲欲盛澗底寂無人松蘿窅然暝惟聞
山鳥啼月上柴門靜終歲寡持醪延歡聊煮茗羣書北
窓下帙亂誰能整

廬陵客館雨霽登樓言懷寄友

終日坐汾渙邈然無少欣登樓一周覽始見萬山羣微
雨洗殘暑青天捲浮雲襟懷兩廓落朗若見夫君見君
君何在顧影還獨笑吏非金門遊隱異滄江調江明秋
月白山空夜猿嘯徒事百卷文未返一竿釣留滯豈勝
愁非君誰與謀水寒終赴海雁遠暫賓秋舉世不可語
猶當傲巢由贈君三尺劍永駕五湖舟

還山吟

日暮望南山悵然歸思發如何山中客屢看城頭月城
頭月照女蘿秋石磴潺湲瀉碧流猿久別應惆悵澗
鳥相呼亦共愁城南故人與我好令我忘却歸山道昨
夜西窓夢到家忽驚千嶂之花老朝來舟子促辭君回
首空江語尚聞別後莫嗟難見面相思只望嶺頭雲

思歸引

海上之草綠芊芊洞門一閉今幾年仙驪去時留紫鞭
掛壁見之心惘然欲歸即歸亦由我不待功成何不可

堯舜未能屈巢由自餘王侯何足遊武陵春水綠蕭蕭
就中亦有桑麻郊近聞秦人笑相語待我東溪種碧桃
夢遊廬山謠示同志

昨夜月落西窓陰倦推素枕凭石琴身居紅塵不自覺
夢入廬山深復深廬山深處在何許五老仙人邀我語
眉如秀雪顏桃花酌酒相酣坐箕踞明河九派倒西來
石壁巉崖古道開五公握手向我笑不見劫火揚塵灰
獨騎一鹿窮蒙廼宵然醉踏青錦苔松風號嘈何清哀

湍飛瀑捲萬壑雷忽然驚起迷所向四坐已失黃崔嵬
披衣徬皇還太息我與世途何所屑亂世茫茫飛蟻蠓
囊中別有金膏訣須君之行當何時共向丹壑卧松雪

別客

客鬢風霜晚離亭鼓角聞念君當此去把袂不能分衡
霍連秋氣瀟湘合暮雲愁心將落葉向晚共紛紛

訪益上人蘭若

獨尋青蓮宇行過白沙灘一逕入林雪數峰生暮寒山

僧喜客至林間借人看吟罷拂衣去鐘聲雲外殘

出塞行

將軍救朔邊都護上祁連六郡飛傳檄三河聚控弦連
營當太白吹角動遙天何日匈奴滅中原得宴然

關山月

今夜關山月偏能照馬鞍盧龍征戍客圓缺幾迴看遙
想金閨裏應悲玉露寒黃沙三萬里何日是長安

江樓夜月懷故山友人

昨夜江樓月思君好斷腸猿聲相應發山色更青蒼楚
塞來書遠閩關隔夢長今朝看愁髮為雨半成霜

有懷閩風山人

把酒忽惆悵君今吳楚間孤雲隨馬首風雨隔河關心
事竟安在此行殊未還空將百年意泣向寶刀環

懷南昌舊遊

昨在南昌府清遊不可窮杯行江色裏棹進月明中樓
笛吹晴雪菱歌漾晚風坐來懷舊迹萬里一飄蓬

江行

暝色蒹葭外蒼茫旅眺情殘雲和鴈斷新月帶潮生天
到水中盡舟隨樹杪行離家今幾宿厭聽棹歌聲

塞下

鞍馬連年出關河萬里賒將軍思報國壯士恥還家大
漠春無草天山雪作花誰憐李都尉白首沒黃沙

三衢邂逅周月船臨別賦此

戎馬相逢日那知復此間客愁詩莫遣世事酒相關江

上孤舟在天隅兩鬢班更將憂國淚滿袖送君還

孺子臺吟

去年醉與東湖別欲上衡湘泥秋月君家留我却遭迴
悵望還成阻修濶西山縹緲翠屏開復憶滕王倒玉杯
經過始識洪厓井調笑重登孺子臺臺前呼酒折荷花
水淨煙明散落霞舉盃失嘆君何在望斷行雲空咄嗟
故人別後還愁緒比都不是予留處興來目送海邊鴻
歸心挂在閩溪樹

送戴式之歸天台歌

吾聞天台華頂連石橋石橋巉絕橫煙霄下有滄溟萬
折之洪濤上有赤城千丈之霞標峰懸磴斷杳莫測中
有石屏古僊客吟窺混沌愁天公醉飲扶桑泣龍伯遠
來何事遊人間飄飄八極尋名山三花樹下一相見笑
我蕭颯風沙顏手持玉杯酌我酒付我新詩五百首共結
天邊汗漫遊重論方外雲霞友海內詩名今數誰羣賢
翁沓乎相推胸襟浩蕩氣蕭爽豁如洞達笠澤月寒空

萬里雲開時人生聚散何超忽愁折瑤華贈君別君騎
白鹿歸仙山我亦扁舟向吳越明日憑高一望君江花
滿眼愁氛氲天長地濶不可見空有相思寄海雲

送吳會卿再往淮南

故人身披紫綺裘腰珮寶玦騎胡騶英風俠氣橫四海
辭我遠向淮南遊淮南桂樹應猶在八公舉手遙相待
明月高懸五兩頭隨君千里過淮流十年鞍馬邊城道
又是邊城見春草春草萋萋路入秦長安北望空愁人

荆楚奇材多劍客感慨相逢思報國男兒事業早致身
青鬢須防霜雪迫我向人間久拂衣白雪相伴掩岩扉
調琴鼓罷清商曲愁見孤鴻天際飛

臨川逢鄭遐之雲夢

天涯十載無窮恨老淚燈前語罷垂明發又為千里別
相思應盡一生期洞庭浪波帆開晚雲夢蘼葭鳥去遲
世亂音書到何日關河一望不勝悲

將至潯陽途中寄諸昆弟

渺渺孤帆去幾程悠悠天際望湓城一身避亂辭鄉國
千里相思隔弟兄猿呌區廬寒暮色鴈過彭蠡帶秋聲
江湖此去多飄泊腸斷風塵遠別情

客中別吳季高

悠悠遠別半生悲白日相逢又話離海內風塵愁來已
天邊消息到何時洞遶旅雁春歸盡仄步寒潮夜落遲
惆悵孤舟從此去江湖未敢定前期

寄郭招甫時在潯陽

夢向三江買釣船挂帆西去白雲邊
窓開晚色香爐見門落寒聲瀑布懸
百年酒興陶彭澤四海詩名孟浩然
何日真尋塵外迹焚香酌茗話先賢

送崔九過丹陽郡上荆門省親

江國歸心一鴈牽河橋分手數杯傳
千崖萬壑秋聲裏匹馬孤帆落照邊
牛渚寒波翻極浦荆門晚樹合遙天
他時莫枉瑤華問南北相思各渺然

楚江晚思

旅思遙遙倦向南
誰家煙火起晴嵐
孤城歸鳥連寒角
極浦斜陽帶遠帆
楓葉自能悲楚客
竹枝何用怨江潭
今朝欲寫風波恨
千里書成手自緘

西陵望

西陵終日望不見
有歸橈欲去頻
回首寒江起暮潮

送友人

黯黯離筵夕照收
江城羌笛起邊愁
念君此去三千里
何處關山是楚舟

羽林郎

貂帽孤裘塞北裝
黃鬢年少羽林郎
彎弓不怕天山雪
生縛名王入建章

聞笛

江上誰家吹笛聲
月明霜白不堪聽
孤舟萬里瀟湘客
一夜歸心滿洞庭

吳中送歸豫章客

川程極目渺空波
送爾歸舟奈別何
南國音書須早寄

江湖春雁已無多

避亂途中

回首兵戈地遺黎見幾人
他鄉空白髮故國又青春
多難堪長客偷生媿此身
本無匡濟畧歎息漫傷神

樟樹鎮醉後題

吾憐樟樹好取醉欲無還
酒壑鶯兒身辭歌雉子斑
朱樓當碧水紅日下青山
興罷揚鞭去蒼蒼煙霧間

天馬山

我來陟高頂俯瞰臨長川陰崖隱落日疊嶂鳴飛泉獨
立一世外所思千古前回首鳥沒處茫茫生白煙

紫芝岩

羽客逍遙地桃源世未尋我來窺異跡高步越飛岑石
帶藤蘿古泉鳴澗壑深紫芝未可采空寄白雲心

紫霞樓

西樓孤絕倚天青我愛明河對戶橫露滿碧梧風屢起
煙消綠嶠月初生仙人共酌丹霞酒逸侶同吹白玉笙

不向此時窮笑傲更從何處豁高情

送上官偉長

歲晚長愁緒嗟君更遠行
兵戈今日淚江海故人情
此別幾時見寒猿一夜鳴
致君相許在回首壯心驚

豫章城

愛此城高處回鞭醉每醒
江花兩岸白煙樹一行青
雲學山舒態天隨水賦形
已多徐孺子獨向北沉冥

閨怨

欲作遼陽夢愁多自不成錯嫌烏臼鳥半夜隔牕鳴

送趙立道赴闕仍試春官即事感興因成五十韻

嗣聖中天日遺祗憶漢時一王新盛禮萬國賀重熙官
爵霑寰宇光明冠本支窮冬辭老母吉日赴京師祖廣
明斜照寒江結暮漸停杯愁把袂立馬語臨歧草動春
前色梅餘雪後枝湖山饒逸興士友重遊嬉菱唱工迎
客荷舟穩放維土風珍綺帶吳饌熟葦絲塔寺明全碧
樓臺漾淼瀾雲連勾踐國江動伍胥祠閭闔春朝早觝

棲霽景遲柳迎仙伏
軟花簇御樓歌筍
荀來宛馬櫻桃
薦寢帷周家千載
歷漢服萬年
厄駐蹕山川遠
橐弓歲
月移天
俄憂杞國日
再仰咸池
弓創羣臣
淚園陵故國
悲乾坤
開帝統
雨露豁宸
私蜂蠆何
為爾豺狼
欲問誰
箭流元帥
幕城立叛
營旗國體
存矜恤
皇猷務遠
綏且
從鷹一飽
自待虎雙
疲復說京
西亂愁連
蜀道危
倉皇
分隊伍
指點護藩
籬狙詐終
榮馭遊魂
不足羈
幾年腥
戰血今日
痛瘡痍
宗社神靈
在邦家
德澤遺
會聞淝

水提可復雁門騎草詔詞頭切蒲輪禮意車賢良多選
拔社稷在扶持舉動新羣目經綸停一夔長沙何遽往
艱卜竟堪疑莫以朝廷重翻令盜賊窺稍懲鷹隼擊庶
使鳳凰儀薪膽方無倦興圖正入披王孫思報國天府
待忠詞世道多為忌波流幸勿隨從容陳古昔感慨論
邊陲仕進雖云始平生乃在茲青瑣今可復綵服更相
宜漂泊微軀老蹉跎困駟垂散材元自逸正論竟焉裨
誤賞騷人作深慙國士知叫閭時已晚鳴劍志空馳鬱

鬱驅浪俗悠悠歎亂離
羊裘終隱去魚釣復何之
出處從今隔飛騰不可追
濟時須俊傑願都中興期

酬友人

湘江南去少人行
瘴雨蠻煙白草生
誰念梁園舊詞客
枕柳樹下獨聞鶯

兩宋名賢小集卷二百二十五

欽定四庫全書

兩宋名賢小集卷二百二十六

宋 陳思 編

元 陳世隆 補

蕙菴詩稿

何耕字道夫紹興中守蜀之嘉州有惠政與何逢原
孫松壽宋誨號四循良民繪像祀之

青羊宮

一再官錦城咫尺望琳宮未始得得來正望役役中今
朝弄晴雨策蹇隨春風頗愛意象古停驂小從容縹緲
百尺臺突起凌半空憑欄俯脩竹決皆明孤鴻信哉神
仙宅不受塵垢蒙稽首五千言衆妙一以通靜觀萬物
復豈假九轉功區區立訓詁亦哂河上公癡人慕羽化
心外求鴻濛要附白鶴背往訪青羊蹤

靈谿賦雙流郭信可隱居詩

幽居定何如願恨未見之主人向我言喜色融雙眉修

篁流翠陰寒溪漾清漪領略非一狀幽妍發餘姿穴工
濛雨亦佳激灩晴更奇豈惟二江獨意恐兩蜀稀主人
信妙士得此固所宜天公閼好景授受各有時豈無多
田翁偃蹇逝莫隨素交懷老蒲秀句紛珠璣安得招歸
來為君賦清詩往者不可作後生欲何為

龍淵

門前大江河渺漫昔人飲牛水為乾水乾龍逝亦其理
近在咫尺聊泥蟠魚蝦玩侮賓獺笑縱有靈恠誰當省

德人問舍塵我境便爾築室相遮欄坐令異類皆屏伏
恃有此耳差少安却紆朱紱去監郡遣我守舍良獨難
昨來過門恍如夢龍致此語催歸鞍先生不信反不笑
謂我饒舌狂豐干

虛舟

君不見江干車馬紛相送巨編峩峩船載重西南使者
解官歸水淺着沙牽不動如君材具豈多得合待明光
參法從何為淺瀨着虛舟頗笑胸中太空洞問君此意

竟安在欲說向人誰與共山林鐘鼎本同轍繫岸截江
隨所用八牕窅窅淨無塵一水泠泠清可弄何當抱被
過君眠分破江天幽夜夢

題龍華佛閣

西川鑿山三大像突兀皆在江之湄脩覺九頂見略盡
獨此恨未賸客儀揭來勝地了疇昔輕軒瘦馬相追隨
百尺金軀信雄傑三乘寶閣何瑰奇燃犀不用照幽鬼
擊鼓自合趨馮夷前人開創願力廣下與舟楫扶傾危

六月灘濤劇奔吼一分性命爭毫釐篙工落膽行者泣
彈指乞活天人師人心狎水水多禍佛力在人人不知
慈悲但作布施相江神雖怒將何為

普通山距府東十數里青州禪師洪果道場也自
龍華歸過之棟宇頽落僧徒鄙野良為可惜是夜
雨大作因書所聞所見為長韻

錦城之東山培塿突起如藍壓山口入門氣象頗不凡
在昔規模定非苟黃絹碑詞著眼看青州老衲知名久

自披榛逕結茆屋不剪霜華散蓬首市門有女捧巾盥
衣械無花生穢垢至今一轉鵲鵲語散作諸方獅子吼
祖燈寂寞何人繼宰堵宮堯惟鬼守法席草長深沒膝
僧榻屋穿光見斗似聞占藉多衍沃合選名緇振頽朽
我來不覺三歎息眼底盡空諸所有自開主席掃塵全
聊寄閒眠憩奔走夢回中夜雨鳴檐卧聽東風寒入牖
明朝散步轉山脊好語相呼聞野叟抽芒已見麥翻浪
搗炒懸知香滿手須臾日影散林樾絢練春光被花柳

僕夫催歸屢不應景物殊佳寧忍負出山騎馬更躊躇
乘暇應須重載酒

忘機臺

太虛生微雲機事日久繁兼忘豈不佳尚有忘者存稽
首老龐翁妙處布一言請觀臺上月萬古無昭昏

和光亭

枯木倚寒巖三冬無暖氣達人定汝笑胸中太淫渭不
妨聲色海徑造佛祖地所以亦樂翁花前時一醉

自合江亭過渡觀趙穆仲園亭

喚舟芳草渡繫馬綠楊陰步入莓苔徑門開花竹林王
孫隨蛺蝶遠婆女隱雲深想見西南望悠悠空賞心

春日

聞道西樓下香風颺綺羅無錢沽酒得不醉奈愁何老
去春緣薄慵來睡興多閉門終一枕亦不夢南柯

寂寞城南寺三年寄索居折花脩佛供持鉢乞僧餘竟
日無車騎依時認鼓魚九衢塵一尺吾自有華胥

門前無俗物城上亦奇觀
花浪東流穩雲山西望寒
月凌塵外遠目極意中寬
最愛風標客晴沙理青紉

萬里橋邊水朝宗去入吳
衮衣新歷數神算舊規模
四澣從心正諸公著力無
際天東望眼森森但平蕪
唇齒輔車勢坤維井絡方
只宜花柳盛莫遣鳥魚忙
隴麥無由食邊籌是可防
出言還有禁忍淚下成行

題龍華山寺

傑閣山為佛精廬地布金
水涵空濶淨路繞翠微深
鳥

下窺齋跡龍歸識梵音城中塵眯目那得此幽尋

浮翠橋

隔谿蒼翠各西東架竹為梁路始通缺月鏤林凝淨綠
斷霞明水抹殘紅芒鞋步步幽深處藜杖聲聲屈曲中
回首忽驚橋已遠冷然身御圃田風

寒碧亭

凭欄日日俯清湍洗竹年年斬惡竿十頃玻璃秋色靜
一林竿籜曉聲寒涼風有意生天末明月無邊照水端

誰謂過清難久處愚溪元自不相安

遠色閣

小小樓居著散仙淵明真趣本幽然招呼雲月欄干曲
顧揖江山柱杖前獨鳥倦歸翻落日誰家晨爨起炊煙
根塵應接無留礙笑殺胡僧面壁禪

龍華大像蓋冀國夫人所作因成二絕

慧性元從戒定薰百花潭水洗僧袈箇中力量真超絕
故老尚傳娘子軍

生男箇箇欲如狼
嬭女軍中氣不揚
試問爭功嗔目士
幾人能敵浣花娘

假山

空庭幻出小嶙峋
假外應須別有真
只恐話頭成雨極
若為融攝主和賓

蓮塘

色香無比出西方
何物妖狐號六郎
手折一枝聊供佛
前身定是老柴桑


蘭坡

蘭與高人臭味同
含薰聊復待清風
紛紛蕭艾無相笑
兩輦敷榮轉眼空

段文昌讀書臺

段公曾此讀羣書
讀破應須萬卷餘
家禮一傳為雜俎
稗官收拾附虞初

隴麥漸漸滿意青
只憂春旱起蟲螟
當年人誦禱而雨
合向茲山試乞靈



兩宋名賢小集卷二百二十六

欽定四庫全書

集部
兩宋名賢小集卷二百

二十七至
三十一

詳校官中書臣孫溶

助教臣常循覆勘

總校官編修臣王與緒

校對官學正臣周鉉

謄錄監生臣張椿

欽定四庫全書

兩宋名賢小集卷二百二十七

宋 陳思 編

元 陳世隆 補

菊坡集

崔與之字正子廣州增城人紹熙四年進士理宗朝累除廣東安撫使拜參知政事右丞相致仕卒累封南海郡開國公謚清獻有菊坡集

壽邕州趙守

大夏開朱明物態豐且碩薰絃發新奏生意轉無極間
氣清而和融結賦有德碧梧挺幽榦曠度漫九澤富哉
學古胸仁義供服食渾璞希世珍外溫而內直驂騶開
道路聲光日斯赫九關通籍初南來墜雙舄片心清徹
底杯水餞泥軾京兆入幕賓去天不盈尺佳最入聰鑢
行行陟文石邕為五管雄地控西南域專輅難其人弄
印無以易袖却經綸手天邊樹牙戟猩獠叢篁中深棲

而屏息夜月照銅柱警囊聲寂寂邊人解帶卧危地成
樂國屏風御墨鮮早晚來台驛愧我樸樸才潦霧甘遠
役題坐遇知己孤根費培植嵩高生申旦好語誼井陌
碧油寒雲端阻莫陪賀客歌咏淇澳詩清修如圭璧他
年玉班頭蒼髯而赤黻

柴秘書分符章貢同舍餞別用蔡君謨世間萬事
皆塵土留取功名久遠看之句分韻賦詩得世
字

玉立蓬山巔聲望高一世清秋玉壺露耿耿無纖翳中
流屹砥柱愈激而愈厲平生學古胸非謂資生計中邊
事方殷命脉實關係憂世危明王誰流洛陽涕直諫逆
披鱗言言皆獻替胡為厭承明退飛勇且銳有山鬱而
孤雄踞虎頭勢民貧困科擾椎剝已無藝猩獠叢篁中
跳梁無虛歲弄印無以易要起百年弊西風吹馬耳新
涼雨初霽尺札聞先聲遠氓已懷惠旌旗簇小隊畫戟
森兵衛一方覆孟安中原誰共濟顧我亦漫仕空山老

繼
松桂勸海作歸夢乞身尚濡滯着鞭公已先脂秣以相

送夔門丁帥赴名

議論方前席功名早上坡去帆瓜蔓水遺愛竹枝歌同
志星辰少孤愁暮雨多倚風窮望眼碧色森平莎

送范漕赴名

獨汲千尋綆惟開八面牕相逢俱氣許未語已心降分
鎮中邊蜀歸途內外江禁林風雨夜應念鹿門龐

送時漕大卿淮西簡法

卿月高華照楚墟，清雅意見登車星分屯壘雲中戍。
風引餘腥塞下儲，十二聚民行惠政，三千議獄謹刑書。
最聲炫赫流聰續聖詔，今朝下玉除。

十年宦海任飄零，豈料高華伴使星。落魄半生頭已白，
爬沙一見眼長青。天涯明月方依樹，淮上長風忽散萍。
別後誰能效兒女，不堪官柳暗長亭。

張進武善風鑒，謂余旁骨日聳，非晚入臺求詩贈。

之

熒熒碧眼照人寒一別重逢歲又殘老去但求閒處樂
君來猶作向時看誰將伏莽夸顱骨我有盟鷗託肺肝
坎止流行隨所遇何須求夢到邯鄲

揚州官滿辭后土題玉立亭

天上人間一樹花五年於此駐高牙不隨紅藥矜春色
為愛霜筠耐歲華四塞風沉天籟寂空庭月冷市塵賒
臨行更致平安祝一炷清香十萬家

嘉定甲戌正月以金部郎分閫東淮正當金棄巢
南奔之時不願往以君命不敢辭首尾五年而不
得代戊寅臘月以少蓬召而病且衰矣自知不堪
世用決意南歸舟次豫章三疏乞間而不得請幡
然東下艤棹南康重湖閣夜夢人告之曰死於廬
山之下覺而識其事並以小詩謝山神

未到廬山日日陰斜風細雨亂雲深移舟夜壑人間世
荷鍾春郊物外心要把封疆安社稷誰教軒冕換山林

殷勤招隱知深意五老朝來露玉簪

寄黃州趙別駕庾長入蜀舟次黃岡適趙倅奇夫
沿檣行邊不遇以詩寄之

銅梁玉壘碧雲端尺舸西風兩鬢殘世道多岐今已慣
人生一見古來難丈夫不作謀身計巧匠那能袖手看
月白風清雪堂夢銀波萬頃卧龍寒

兩宋名賢小集卷二百二十七